

岭
南
遗
书



端溪硯史卷三

嶺南遺書

嘉應 吳蘭修 石華撰

貢硯

淳化二年夏四月庚午罷端州貢硯

宋史太宗紀

端州歲貢硯十

王存元豐九域志

仁廟以前賜史館官硯多是下巖石其後來歲貢惟上巖

石硯史

石材之大者尤為難得每購求方六七寸而無病脈者固亦少矣比歲所貢方硯者五皆以文為準然止於巖石之中品或有眼工人輒鑿去之恐異日復求不可必致也

唐詢

硯錄

蘭修按太宗罷貢硯而元豐時王存等撰九域志仍載
入土貢米史亦載治平中貢硯事殆未久已復也明代
中使取硯官民苦之設守坑官一員有私取者以竊盜

論我

朝悉除去之每歲端午督撫僅以端硯九方隨葵扇葛巾
進之皆新坑純淨之石嘉慶中用麻子坑近則用茶坑
購自民間製為官式縣官石戶均無科累矣

開坑

龍巖乃唐初取硯處後得下巖龍巖遂不復取之

雲林石譜

下巖穿洞深入不論四時皆為水浸治平中貢硯取水月

餘方及石

硯史

下巖既深工人所費多硯直不補故力無能取近年無復

有聞同上

下巖北壁皆為泉水所浸瀰漫湧溢下流為溪巖中歲久崩摧石屑翳塞積水屈曲深淺人所莫測以是石工不復能採矣今世所有下巖硯唐五季國初時物也欲得下巖北壁石者往往於泉水石屑中得之若南壁石尙或可取然自崇觀以後亦罕得矣宋端溪硯譜

蘭修按高兆端溪硯考云峽將盡岸南山坳有洞書宋

治平四年差太監魏某重開廣語作魏封土人名曰巖仔坑

旁有冢相傳開鑿中虛崩閉數十百人太監死焉守土者葬其冠服於此按此說有不可據者三米芾硯史言

治平中取硯無崩閉之說宋人端硯譜出於紹興初後譜

有淳熙十年榮芑跋云此譜不知何人所撰稱徽祖為太上皇必紹興初人云止云巖中歲久

崩摧石屑翳塞亦無崩閉數百人之說其不可據一也

宋有貢硯無宦官采硯之事內侍省官亦無稱太監者

其不可據二也治平四年摩崖石刻高氏謂在南山劫

廣語謂在老坑硯坑志謂在宣德巖之南治平坑汗漫

吟注謂在梅花坑今徧訪俱無之其不可據三也翁方綱

東金石畧聞羚羊峽硯坑內摩崖刻治平四年歲次丁未重開此古巖字未及訪云云傳聞互異皆塗說也

太監墳在老坑岡頂高氏謂在巖仔坑旁誤殆明代太監卒葬於

此遂傳會為此說耳水巖偏仄石工皆匍伏而入安得

太監閉於此乎

下巖上巖皆在山半上巖之穴陟而取石中巖之穴或陟
或降下巖之穴降而取石

同上

今下巖石盡遂取諸半邊巖近亦塞矣獨上巖可取之

雲林

石譜

端州古硯材所自出然惟下巖爲一品自宋徽宗窮全盛

物力採貢以進除內府所藏自親王大璫及兩府侍從以
下俱得沾賜嗣後沙壅水深不復可施工此硯遂爲絕世
奇寶靖康南渡士大夫各攜以過江及德祐隨駕又攜至
閩中至莆田舟覆人硯俱沒盡爲彼中土人所得正嘉中
士紳始知貴重流入吳中爭購之間人因僞造以欺肉眼

今宋端硯滿天下皆莆中贗物也

沈德符萬厝野獲編

蘭修按周氏硯坑志云治平坑土人又稱曰坑仔巖據此則坑仔巖卽宋之下巖也宋之下巖塞自崇觀以前今之水巖開自萬厯以後且其地相越里許作譜者皆混而爲一宜其言之輻轳也

宣德六年開坑石刻爲公務事奉

缺

差往廣東等處採取

端硯等石欽遵督同廣東都布司委官千戶成知事
劉銘提調官肇慶衛府指揮使栗友同知王瑛知府王瑩
推官蕭宗成肇慶衛所口官千戶李謙百戶蘇成沈進鎮
口口郭亮府州縣委官河泊所官蕭昉主簿謝恭巡檢張
斌口口口庭典術周清訓科梁霓歐青詹英壽并衛府所
屬官高要縣知縣蕭進口口口壹百餘名同於宣德六年

十月初三日開巖採取硯石於中多有花點水痕不堪大者長不過一尺四寸中者長不過一尺二寸八分小者長不過一口口分并不及尺寸者有之工程浩大百中無一採取艱難遂於本年夏四月二十二日完備住工進訖刻石以爲記云 宣德七年壬子夏四月日 右宣德採硯

記正書在爛柯山飛鼠巖外

高要縣志

蘭修按此宣德六年所開水坑在屏風背後今名宣德巖久廢不取

萬厯二十八年開坑石刻欽差督理廣東雷州等處地方珠池鹽法內官監太監李奉旨於萬厯二十八年七月十七日開坑至二十九年正月二十八日暫封 口督造委

官余口口立 右萬厯開硯坑題字正書在爛柯山水巖
外太監李下不署名明史神宗紀萬厯二十五年遣中使
李敬採珠廣東當卽此人高兆端硯考引此作督理珠池
市舶內官監太監李鳳鳳二十七年權稅至廣無督理珠
池之銜高氏殆誤記

同上

蘭修按明史宦官梁永傳李鳳與珠池監李敬相仇巡
按李時華恃敬援劾鳳給事中宋一韓言鳳乾沒五千
餘萬他珍寶稱是帝不問而敬惡亦不減於鳳採珠七
八年歲得珠近萬兩其後珠池盜起乃請罷採云云考

神宗紀遣李敬採珠在二十六年六月

高要縣志引作
二十五年誤

罷採珠在三十二年十二月與採珠七八年之說正合

是李鳳未嘗督理珠池而開坑者爲李敬無疑也萬厯

野獲編云己亥歲

萬厯二十七年

珠池內臣李鳳命蠻人採下

巖石其誤又不自高氏矣

又按高要縣志云唐宋端石皆非今水巖宣德以前所
取亦非今水巖惟萬厯二十八年石刻在水巖上蓋萬
厯間始開也又明季陳喬生硯書云水巖開於近日數
十年來始知重之舊硯實不如也則水巖開於萬厯間
審矣錢朝鼎水坑石記云水巖開於成化中殆未見石
刻也以下所載開坑皆今水巖

開坑先引水閘月費金錢至累千金舊制把總一員專轄
守坑律令盜坑石比竊盜論其厲禁如此永樂宣德開坑

未幾俱罷去崇禎末蜀人熊文燦總督兩廣日指揮蘇萬
邦致石工於江西緼火中夜開坑不敢自日中也丁亥後
守禁罷至今凡六開坑工受官役日有程不擇虜理鑿伐
拆裂宋元明五百餘年未聞也

端溪硯考

蘭修按高氏云丁亥後守禁罷至今凡六開坑又云丁
卯冬予遊端州值開坑據此則順治三年丁亥至康熙
二十六年丁卯凡六開坑也又廣語云予少時頗蓄硯
以熊制府所開石爲最次則某藩王所開按尙藩削於
康熙十九年則開坑在六次之一也又朱竹垞說硯云
予遊嶺表正值採硯時按朱竹垞度嶺在康熙三十二

年癸酉在六開坑之後矣

雍正三年冬開水巖

硯坑志

蘭修按吳繩年

字淞巖浙江錢塘人乾隆十七年官肇慶府知府

水巖大西洞

硯石說云予既躬歷其地備閱夫硯材之妍媸好醜覺

於前人未言之見聞頗獲半解爰抒臆見用述端簡云

云其端溪硯坑志三卷作於乾隆十八年癸酉其開坑

當在十七年壬申也

乾隆庚子歲

蘭修按四十五年

孫廉使春巖公

蘭修按孫公名嘉樂浙江仁和人

監司肇羅道開採西洞方涓吉啓穴雷雨暴作穴中烟霧

蒸騰工不得入乃爲文祭告山靈越三日始息每日集汲

水工二百名厚給工價晝夜更汲自九月初一日起至十

二月十五日方涸水見石越歲辛丑三月朔忽有虎來攫

食犬豕日夕守臥驅之不去似有呵護狀而穴中春泉湧

發工不能施遂止山川之寶造物所靳豈偶然哉余於夏

五始臨郡蘭修按袁樹浙江仁和人乾隆四十六年官肇慶府知府下車即訪求石友

為大力者羅致無遺壬寅冬蘭修按四十七年方伯鄭公蘭修按鄭公名

源璫直隸豐潤人復捐俸開採命余董其事獨啓大西洞惜興工

較遲閱癸卯正月始涸水見石未匝月春泉驟生獲石無

幾而完壁尤難乃聚先後所獲石規之範之各就其材得

硯百二十方端溪硯譜記

嘉慶元年開坑石刻據拓本節錄丙辰八月二十七日鳩工取

水以十一月十九日水盡取石明年丁巳二月二十二日

水長封坑共得大西洞石六千塊有奇小西洞約千塊凡

日用匠百人用工萬七千有奇匠日給錢人百二十變從前以石抵工例者愛石也其費合同僚釀金成之其石依入金之數均分焉余首官斯土司茲役工竣記其事嘉慶二年二月二十二日肇慶府知府廣玉記

廣玉開坑記

蘭修按右石刻在水巖外硯神廟廣玉正白旗人乾隆五十九年知肇慶府嘉慶六年知府楊有源復開坑道光八年冬高要縣丞陳銓僱役汲水至洞仔力盡而止未至西洞也拾得數百出皆前人棄餘殘礫有魚腦青花蕉白者亦發墨勝於各坑但色皆灰赤無活相矣

硯坑洞門在半山之下進洞口轉右名摩胸石堅不可鑿容一人裸體匍伏而進自洞口至洞底高下相懸約二十

八九丈一路高止三尺寬止三四尺不能起立匠作帶領
 小工各攜小磁罈一竹箕一罈可容水五升箕可貯石十
 餘斤每隔三尺排坐一人然燈一盞晝夜將水傳遞運出
 於洞口外開一小溝設車一架用篾筐戽水至車脚然後
 車放入溪進洞暫遠人數愈增至西洞須排八十餘人

蘭修

按廣玉開坑記云約八十丈至大西洞是誤以人數為丈數也

方得水乾隔三五日又須

引去客水一次然後看明石壁脈絡下鑿採取否則遇鑿
 出火并亦無用也一歲之中惟冬月水涸時可開採而運
 石汲水先需兩月有餘一遇春水發生技無所施蘇長公
 云千夫挽縷百夫運斤篝火下縋以出斯珍洵開採之不

易而老坑端石之可寶也

端溪硯石坑志

入洞丈許有兩石橫亘中通一穴入則仰臥先以足出俯臥先以首名摩胸石再入為梅花椿洞初闢時存石為柱

以防傾陷後人并取石柱易以巨木為梅花形也端溪硯譜記

洞中幽黑不知晝夜熬豚膏為盤燈以燭之蘭修按今用茶油水坑記

云燈用豬脂他油則烟盛而人目不能視非也凡鑿各分石堂兩人共一堂一堂

一燈一鎚鑿一人臥一人鑿彼此更替蓋洞偏須曲脊仰

鑿非更替不能耐也嶺海見聞

蘭修按道光十三年冬端州人請開水巖以工代賑宮

保盧涿州師許之於十一月廿七日開工次年正月初

十日取石三月初十日水長封坑凡取水列坐傳汲每

三尺坐一人自洞口入丈許為摩胸石旁為水槽口自

此四人通廟尾六人通飛鼠巖舊有口出今塞十二人至梅花

椿十八人至東洞口二十八人至中水槽向所無此次開坑砌石為

之四十八人至洞仔五十四人至正洞大水湖湖廣七

八尺深如之湖後高一級約三丈許至拱篷口又丈餘

至水歸洞口眾水所歸故名皆有水槽不坐人稍進為小西洞

口又進為大西洞水歸洞與大西洞相通大西洞三人

起水注水槽流入水歸洞水歸洞十八人起水拱篷五

人起水均注水槽流入大水湖大水湖三人起水傳至

中水槽自此再汲傳至外水槽向用瓦甕今用木盤向

由大水湖汲水至洞口耗水十之三四今由中水槽汲

水至洞口耗水十之一二故費省而功速也水歸洞口

最佳然涸水甚難不能施鑿如宋之下巖北壁得片石者珍於拱壁矣

逸事

甘叔元藏許敬宗硯後官杭漁人於浙江網一銅匣鑄許敬宗硯兩方足匣有容足處卽敬宗物叔元子遺孫莘老莘老憎其人求得之端石也潤如玉殺墨如風微窪真四百餘年物匣在唐諶處當合

硯箋引東坡雜說

劉涇州以所得李士衡觀察家蟾蜍硯其下刻云天寶八年冬端州刺史李元得靈石造示劉原父方與余飲辨云天寶稱載此稱年僞也遂作詩予與江鄰幾諸君和之

梅堯

臣宛

陵集

御府有聚寶硯玉版太乙船無眼而溫潤皆寶硯也杜季

陽端石蟾蜍硯篆玉溪生山房李商隱硯也

周密雲烟過眼錄

紫蟾蜍硯端溪石也無眼正紫色腹有古篆玉溪生山房

五字藏於吳興陶定安世家云李義山遺硯其蓋有東坡

小楷書銘屢欲易余東坡醉草未許而以拱壁易向叔堅

矣

何蘧春潛記聞

余兄宗勝所用鐵護硯端溪石也溫潤如玉為滌者墮地

缺其受水處乃以漆固而鐵護其外

臨汝史君任道所寶龍香硯端溪石也色深紫依古斗樣

每貯水磨濡久之則香氣襲人

吳興許採字師正自為兒時已有硯癖所藏具四方名品

幾至百枚猶求取不已嘗言吾死則以硯贄壙無遺憾矣
最佳者得蔡君謨所寶端溪硯一圓厚寸餘可徑尺色正
青紫有一眼才如箸大名之景星助月又一端石古斗樣
長尺餘馬肝色下有王禹偁丞相書玉堂舊物四字又圓
硯下巖石有二碧眼中極窪下溫潤發墨師正常所用者
莫養正爲之銘曰圓如鏡窪如尊勿謂其琢削不巧具謂
椎魯無文卽而視之其中甚溫又一端石玉堂樣者授余
深紫色無眼余命之曰端友且爲之銘云君子取友必端
子有韞玉之美復具眼而知默祈漸摩以窮年爲予之三
益也

永嘉林叔睿所藏端石馬蹄樣深紫色厚寸許而徑七八

寸下有鄭魁銘詩隸字甚奇云仙翁種玉芝耕得紫玻璃
磨出海鯨血鑿成天馬蹄潤應通月窟洗合就雲溪常恐
魍魎奪山行亦自攜

俱同上

予生十五六歲卽篤喜硯墨紙筆四者之好皆均若墨紙
筆居常購求必得其精者但取用之不乏至於可愛終身
獨硯而已竊自省記予方冠時得先君所授端溪石硯其
製上圓下方纔長四寸餘心有鵠鵠眼又有金線亦當時
人所罕睹者後於京師得閣門副使侯宗亮古石硯長六
寸以外後刻延和二年字硯形外方而貯水處乃圓其下
不加鐫鑿石色青紫相閒模制頗古但於墨色不甚相宜
然亦寶之凡十年至爲梧州太守道出端州往還二年間

端人有崔之才最爲好事使之搜訪前後所得其尤者四
率用侯宗亮琢之較所藏先君者殊已過之

唐詢
硯錄

端州崔生之才居端巖側一日工者於後巖百丈阬剖石
得紫龍卵造成硯長尺廣減尺之四厚重寬平開匣粹潤
若有德君子眼暈六七重無纖瑕微近手則潤澤可磨墨
矣崔抱硯忘寢食者久之後來遺余試以澄心堂紙李廷

珪墨諸葛漸筆

蔡襄
硯記

陳公密縝知端州部民蓄奇硯破其家得之硯面熨斗焦
如黑龍奮迅二鵠鵠眼爲目每晦則雲霧輒興公密沒歸
張仲謀政和間入禁中書府其後龍德宮服玩爲都監王

殊所匿復歸謝衣家

硯箋引蘇
養直集

丁寶臣知端州製綠石研送王介甫謂之玉堂新樣王荆
公報之以詩云玉堂新樣世爭傳况以蠻溪綠石鐫

類林

宋熙寧中杜諮知端州禁民毋得采石而知州占斷人號
爲杜萬石周濂溪時提點廣南東路刑獄惡其奪民之利
因爲起請凡仕於州者買硯毋得過二枚遂著爲令葉石
洞云宋貢硯惟賜史官故端硯重於天下杜諮遂以蒙詬
夫有尤物皆足厲民正統後采硯之使不至人直礪視之
非惟上所好耶善乎子罕之辭玉也曰懼喪吾寶嗟嗟吾
寶無喪多矣而奚人之寶爲傳稱唐有韋承慶左遷高要
尉有餽紫硯者置案上歲餘起辰州刺史復以還之包孝
肅知端州秩滿有一硯投於羚羊峽口馬晞驥判肇慶府

有潛以奇硯獻者晞驥曰此亦長物也謝之噫若三公者可謂無喪其寶者哉

廣語

李元時古端硯廣踰咫厚二寸栗澤芒潤其端石之美琢製甚質容水處深而底平非邇來所作

硯箋

蘇東坡頴濱兄弟試制策各攜一端硯外孫文驥得其一

過藏其一名賢良硯

同上

或謂居士吾當往端溪可爲公購硯居士曰吾兩手其一解寫字而有三硯何以多爲曰以備損壞居士曰吾手或先硯壞曰真手不壞居士曰真硯不損

蘇軾東坡集

羚羊峽紫石硯東坡先生攜至海南元符三年自儋耳移廉州之瓊特以贈余爲別歲月遷流追維先生言論邈不

可卽倩工鐫先生遺像爲瓣香之奉云崇寧元年十二月

十九日瓊州姜君弼謹識

姜唐佐東坡硯識

胡堂長伯量記度常卿涵星硯云寶慶丙戌秋八月渝州
度使君正奉詔入京過金陵出其所藏坡仙涵星硯而廬
山胡詠記之曰硯端石以石眼在池得名形方以今尺度
之可廣四寸其表倍蕤高寸有半上廣下殺其陰容掌不
啻面出玉斗爲池斗之半微爲窪坡如半月用以限墨星
在池者十有三下皆乘以雲氣大者四其二近半月其二
倚南壁而一復差大而高外微綠中黃瞳如針眼而紺碧
眾星此爲獨勝小者九二倚東壁二倚西壁如參商然五
者中立一高二次而二低如聚東井然汲泉滿池粲粲相

耀半月上墨元雲鬣鬣而下古人製作之精如此星在陰者二上列四字曰癸巳端巖下三字曰子容記子容蘇丞相頌意其初得也東壁之外有墨書子瞻二字下有三字惟泓字彷彿二不可辨西壁外子功二字使君曰硯陰七字本亦未刊以借觀者眾懼把玩之多遂成泯沒故李氏刊之按坡詩有以涵星硯贈范淳夫侍郎風月石屏贈子功中書共二首詩中摹寫與此硯實合以年譜考之當在元祐八年癸酉硯後歸李才元家其孫家於成都之成都縣使君以百五十緡購得之外周以二髹匣蓋陰各有朱字紀歲月及土人姓名外者己亥洋州造大方誌內者辛未杭州後洋沈上宰坡仙元祐己巳以龍圖閣直學士左

朝奉郎知杭州至辛未二月九日除翰林承旨則內匣為坡仙在杭作無疑距作詩為先三年耳范李後為姻家故

硯歸李氏云

游宦紀聞

文太史得古端硯銳首豐下形如覆盆面縷五星聚奎及蓬萊三島左右蟠雙螭刻其背合虛鐫刻東坡製銘一龜橫出作屭鼻狀文縷精緻不知何時物也因命為五星硯

陳繼儒
妮古錄

丁晉公自海外徙宅光州臨終以一巨篋寄郡帑中題云候五十五年有姓丁來此作通判可分付開之至是歲僑來貳郡政即晉公之孫計其所留年月尚未生啓視之但一黑匣貯大端硯一枚上有小竅以一碁子覆之揭之有

水一泓流水無有歇時温潤之甚不可名狀丁氏子孫至

今寶之王明清揮塵餘錄

米元章書法入神徽宗命書周官篇於御屏縱觀稱賞元

章再拜求索所用端硯因就賜元章喜拜置之懷中墨汁

淋漓朝服帝大笑湯屋書鑒

李元暉蓄米元章端石硯其背刻元暉題字云此硯色青

紫而潤下巖石也陸友硯北雜志

御府寶硯曰蒼龍橫沼內有龍形橫硯池中世所謂巖花

是也同上

硯譜云端石有鵠鵠眼為貴眼石病也余謂不然若犀象

之有文皆物之奇也烏得以病言之舊見士人王堯佐所

蓄端硯其一眼正圓大若芡實青綠黃相重其色鮮美自

外至心凡六七重誠為罕得也胡仔漁隱叢話

何持之有一端硯形正圓馬肝色中盤一金色龍頭角爪

尾粲然畢具會有知者即以進御陳耀文天中記

端溪硯工見有飛鷺翹駐潭心因令沒入視之綱得一石

石既登岸轉仄之若有涵水聲硯工曰是必有子石剖之

得一石於泓水中大如鷺卵色紫玉也刻為二硯同上

綠端松磬硯長七八寸蓋硯板也其上刻松枝石磬而以

半磬為硯池細潤發墨趙子昂銘其陰東軒筆錄

趙子昂端石辟雍硯名曰大雅雲烟過眼錄

元張憲有玉帶生歌其序云玉帶生端人也事文山丞相

爲文墨賓初宋上皇以丞相恩賜生紫衣玉帶至今不改其舊服生爲人端厚強記默識丞相素重之呼召不以名

但曰玉帶生

淵鑑類函

余至端州

蘭修按施開章廣東學政在順治九年壬辰

得水巖大石方直可尺

餘琢硯二十片又購得二三石子鵠鵠眼絕奇者載歸次

平樂會賊陷桂林盡棄舟篋脫身東踰梅嶺歸笥中硯十

亡其六七矣始自笑曰拙於書而勞於硯不亦惑與親交

過存將去都盡既十許年發敝篋得硯林拾遺稿次而錄

之以志余所得於端江者若此貯之巾箱卽號爲石友可

也

施開章硯林拾遺跋

乾隆壬申余在厯下有客匣硯至啓之則結綠硯也余曰

是非新城王氏物乎余聞此硯久矣何爲乎來哉客曰第
觀之硯端溪之老坑也面平無池厚寸許縱五寸衡得縱
之半色若馬肝而差淡質細潤青花隱隱如荇藻浮動別
有嫩綠斑厯厯若星辰之在天故錫以嘉名也其背有隸
古書漁洋老人銘曰此非結綠也何以沿結綠之名殆如
虎賁之似中郎耶雖無老成人尙有典型右芻署幔亭珍
藏亦古隸書體類唐人韶逸可愛蓋老人屬門人林吉人

舍人所書也

沈廷芳隱拙齋集

余有硯癖藏端溪石甚夥因名書舍曰硯林尤珍視者二
硯一曰鷺子康熙中先大夫得之曹秋岳侍郎家以遺廷
芳者石修四寸廣半之青花隱隱若細藻縈繞頂有鷓鴣

眼二甚瑩活侍郎詩云不信窮途知已在一雙
鵠鵠眼長青卽此也一曰龍池浴日乾隆丙辰

上賜者圓如璧而旁稍殺著手奇潤池鑄雙龍捧日狀同
年齊侍郎召南銘之曰旁龍池揮鳳翰華日卿雲光紉縵

二硯皆端溪水巖石

同上

余獲端硯於京師市中其中為蕉白四面皆火捺衛之若
雲蒸霞蔚閃爍無定殆杜少陵所云其滑乃清波其光或
雷電是也用之數年能蓄水不拒墨不損毫取青花諸品

較之皆莫能作

彭端叔端溪硯坑志序

余於端州舊家得陳文恭硯旁刻白沙藏硯四字通體斑
剝墨痕繡食古色可愛乃刻梅山周氏真賞六篆於其陰

然其寬長不及三四寸厚亦不過五六分蓋水巖之石欲
得盡善盡美洵如廣語所云大不盈掌耳

硯坑志

端溪硯史卷三

譚瑩玉生覆校

右端溪硯史三卷 國朝嘉應吳蘭脩石華撰按是書專論端溪硯石亦刺取羣書各以類相從而分註書名於各條之下閒附斷語頗具別裁昔賢謂今人事事總讓古人而反是者推算與奕棋是也而吾謂論端溪硯石者亦同宋端溪硯譜一卷 四庫全書已著錄提要稱後端硯獨重於世而鑒別之法亦漸以精密亦猶此意也夫自宋迄今論端硯專書阮通志藝文略所收共六種似均不如是書之精審遑論其他卽以屈氏新語所論陳喬生所著硯書俱生長嶺南殆嘗親至端州而得其詳者積薪之嘆恐前賢均當畏後生也是書無甚異於眾人之說而有稍異於眾人之說其最微妙精確者亦特以所徵寶硯堂硯辨

數條硯辨端溪何石卿茂才傳瑤撰廣文稱其剖析毫芒
辨別疑似雖老石工不能及洵不誣也亦可知著撰徵引
取其博尤貴得其精矣道光庚戌立秋合節南海伍崇曜
謹跋

宋徽宗御製一錄 四庫全書曰其於世運亦未嘗無
而又是善書其與奕欺豈少而吾儒命微矣哉曰
辨之可謂精微也其假若實能令人事事動觀
論敵奕奕古亦快如楚書台以觀其西公其書
自前必與史三公 國朝諸君吳蘭前口筆與史書

奧

蕪

四

璽

璽

璽

月 錯
南 炎
漢 三
伍 十
氏 卷
開 昔
離 二

昔之選粵詩有嶺南文獻續嶺南文獻廣東文選然三書
不皆專於詩也專於詩者嶺南五朝詩選廣東詩粹廣東
詩海大抵以廣收並蓄表揚前哲爲主顧每觀各選俱首
曲江一似曲江以前無詩者又有明諸君口談唐律遇宋
元人作輒行刊落以故兩代篇什流傳日尠余竊不自量
度迺發家中所有聚而錄之不足則借人閱市積有歲月
得若干家雖屬單詞亦必甄錄至如文獻清獻武溪文溪
邵先輩陳嵩伯歐上舍趙王孫各有傳編均在所闕溯自
建始之年迄於有元之世都成一編釐爲四卷疎脫遺亡
誠所不免考訂補輯是所望於後之人道光十九年五月
十一日石谿病夫自序

粵詩蒐逸卷一

嶺南遺書

番禺 黃子高 叔立撰

陳

劉

刪

字正簡南海人少篤學有志操州郡舉為諮議侯景之亂侯官合徐伯陽浮海至廣州見所為

文歎曰嶺左奇才也及伯陽為司空侯安都記室函薦其詞學太建初召至京師除臨海王長史與記室張正見輩為文翰之友王深禮遇之後卒於官

泛宮亭湖

迴艫乘派水舉帆逐分風
滉瀆疑無際飄颺似度空
檣鳥排鳥道船影沒河宮
孤石滄波裏匡山苦霧中
寄謝千金子安知萬里蓬

侯司空宅詠妓

石家金谷妓粧罷出蘭閨看花只欲笑聞瑟不勝啼山邊
歌落日池上舞前溪將人當桃李何處不成蹊

賦得蘇武

奉使窮沙漠收淚上河梁食雪天山近思歸海路長繫書
秋待雁握節暮看羊因思李都尉還漢不相忘

賦松上輕蘿

葉繞千年蓋條依百尺枝屬與松風動時將薜影垂學帶
非難結爲衣或易披山阿若近遠獨有楚人知

詠青草

雨淋三春葉風傳十步香映袍憐色重臨書喜帶長

賦得馬

獨飲臨寒窟，離羣思北風。
陳王欲觀舞，御史自隨驄。
邊聲隕客淚，果下益桃紅。
恆持沛艾影，解向平陵東。

詠蟬

聲流上林苑，影入守臣冠。
得飲元天露，何辭高柳寒。

采藥遊名山

名山本鬱盤，道士貴黃冠。
獨馭千年鶴，來尋五色丸。
石牀新溜乳，金竈欲成丹。
定知無二價，非復在長安。

獨鶴凌雲去

孤鳴思滄海，矯翮避虞機。
怨別悽琴曲，凌風散舞衣。
五里雖迴顧，千年會欲歸。
寄語雷門鼓，無復一雙飛。

以上俱藝文類聚

唐

張

佺

九齡族孫天寶至德間人

辭房相公

秋風颯颯雨霏霏愁殺栖遑一布衣
辭君且作隨陽客海

內無家何處歸

欽定全唐詩

廖有方

南海人貢士柳宗元嘗稱之

葬寶雞行路士人

嗟君沒世委空囊幾度勞心翰墨場
半面為君申一慟不

知何處是家鄉

唐人萬首絕句

劉

軻

字希仁曲江人潘存實同榜進士終洛州刺史

玉聲如樂

玉振能旋止人言與樂并繁聲忽已闕
雅韻詘然清佩想

停仙步泉疑咽夜聲曲終無異聽響極有餘情特達知難
擬玲瓏豈易名崑山如可得一片佇為榮全唐詩

盧宗同

字望淵南海人元和十年進士官集賢校理

題慈恩寺塔

東來曉日上翔鸞西轉蒼龍拂露盤渭水冷光搖藻井玉
峯晴色墮欄干九重宮闕參差見百二山河表裏觀暫輟
去蓬悲不定一凭金界望長安夢溪筆談

鄭愚

番禺人開成二年進士咸通中觀察桂管入為禮部侍郎黃巢平後出鎮南海終尚書左僕射

泛石岐

此日攜琴劔飄然事遠遊臺山初罷霧岐海正分流漁浦
颺來笛鴻達翼去舟鬢愁蒲柳早衣怯芰荷秋未卜虞翻

宅休登王粲樓悠然懷伴侶徒爾賦離憂

全唐詩載此祇臺山初罷霧四

句題為幼作番禺縣志本傳引之茲特從嶺南鼓吹

茶詩

嫩芽香且靈吾謂草中英夜白和烟擣寒爐對雪烹惟憂

碧粉散嘗見綠花生

全唐詩最是堪珍重能令睡思清從類函三百九十補入

詩人玉屑番禺鄭僕射嘗遊湘中宿於驛樓夜遇女子誦詩云紅樹醉秋色碧溪彈夜絃佳期不可再風雨杳

如年頃刻不見

湘中怨諷

青蠟苦幽獨隔江相對稀夜寒蘆葉雨空作一聲歸類苑闕○

唐人萬首絕句載此下題云鄭僕射不言其名予証以驛樓遇女子事其為愚作無疑

醉題廣州使院

數年百姓受飢荒太守貪殘似虎狼今日海隅魚米賤大
須慙媿石榴黃

擬權龍褒體贈鄆縣李合及寄朝右

李合因之休官

鄆縣李長官橫琴膝上弄不聞有政聲但見手子動

以上二首

全唐詩
諧諷二

莫宣卿

字仲節封州人天中閒
舉第一官台州別駕

答問讀書居

書屋倚麒麟不同牛馬路牀頭萬卷書溪上五龍渡井汲
冽寒泉桂花香玉露茅簷無外物只見青雲護

百官乘月早朝聽殘漏

建禮儼朝冠重門耿夜闌碧空蟾魄度清禁漏聲殘候曉

車輿合凌霜劍佩寒星河猶皎皎銀箭尙珊珊杳靄祥光起霏微瑞氣攢忻逢聖明代長願接鵷鸞

賦得水懷珠

長川含媚色波底孕靈珠素魄生蘋末圓規照水隅淪漣

冰彩動蕩漾瑞光鋪迴夜一作夜迴星同貫清秋一作秋清岸不枯

江妃思在掌海客亦忘軀合浦當還日恩威信已敷

句

我本南山鳳豈同凡鳥羣見封川志○以上俱全唐詩

五代

黃匪躬連州人登唐光啓三年進士後仕梁掌江西鍾傳幕奏記

句

志大惟憂國恩深豈顧家

連州志

志載匪躬幼負詩名尤為楚王馬殷所傾慕會匪躬以使事至殷大喜盡蠲其門戶租役匪躬固辭殷曰老夫

嘗恐不一挹清風今幸得見之恐不足以奉湯沐

吳

霽

字廷俊連州人登唐光化三年進士後仕于梁

句

烟隨紅焰斷化作白雲飛

詠野燒○連州志本傳

志載霽母浣帛於江觸沈鯉而妊既生膊上有肉鱗七歲時即能詩黃巢之亂為寇兵所得梁主深器之置之幕府開平三年改其鄉曰衣錦里曰論忠

張

鴻

連州桂陽人天祐二年進士隱居不仕有集十二卷

貞女石

相傳秦時有數女遊卒遇風雨一女化為石

當時非望夫亦不採蘼蕪自化為貞質因茲入畫圖風恬

潭鏡朗雲散石房孤寄語郴江婦初心相似無連州志

連州志本傳張鴻天祐二年進士時唐祚式微鴻知勢不可為遂決意肥遯孟賓于水部嘗以詩投之云自憐

成事攀仙桂誰似投間向草萊蓋高之也鴻詩清純著述甚富有集十二卷行於世

鄧恂美連州人天福中與孟賓于並為李若虛薦入洛陽擢進士第周行逢節度河南留置幕下後為

所殺

和李昉學士

詞場幾度讓長鞭又向清朝賀九遷品秩雖然殊此日歲寒終不改當年馳名已早超三院侍直仍忻步八磚今日

相逢翻自愧閒吟對酒倍潛然連州志

石文德連州人仕楚為水部員外郎後出為融州刺史著有唐朝新纂三卷

句

月沈湘浦冷花謝漢宮秋

秦國夫人挽歌○連州志

周

濱

濱連州人渭弟

重門曲

憔悴容華怯對春寂寥宮殿鎖閒門此身却羨宮中樹不
失芳時雨露恩

逢鄰女

日高鄰女笑相逢慢束羅裙半露胸莫向秋池照綠水參
差羞殺白芙蓉

廢宅

牢落畫堂空鎖塵荒涼庭樹暗消春豪家莫笑此中事曾
見此中人笑人

胡君防 字朝宗連州人與黃匪躬鄧恂美並名歌謠好效李長吉體著有蘂川詩集

句

避世一處士傳家三詔書 贈魏野處士

桃榔雨醉江城夜橄欖風吟野驛秋 送郡太守

樓臺舊地牛羊滿宮殿遺基禾黍平 咸陽間望

島日斜明僧寺閣汀雲低影客船窗 水邊

水邊閒詠處雲島月斜明 俱連州志本傳

孟賓于 字國儀連州人少孤力學自湖湘赴洛應舉天福九年登第還鄉為馬氏從事後歸南唐為塗

陽令坐繫赦歸後主起為水部員外致仕初居吉州玉笥山自號羣玉峯叟後還連上有金鰲集二卷

礮溪懷古

良哉呂尚父深隱始歸周釣石千年在春風一水流松根

盤蘇石花影臥沙鷗誰更懷韜術追思古渡頭

懷連上舊居

閒思連上景難齊樹遶仙鄉路遶溪明月夜舟漁父唱春
風平野鷓鴣啼城邊寄信歸雲外花下傾杯到日西更憶
海陽垂釣侶昔年相遇草萋萋

公子行

錦衣紅奪彩霞明侵曉春遊向野庭不識農夫辛苦力驕
驄踏爛麥青青

湘江亭

獨宿大中年裏寺樊籠得出事無心寒山夢覺一聲磬霜
葉滿林秋正深

題梅仙館

仙界路遙雲縹緲古壇風冷葉蕭騷後來豈合言淹滯一

尉昇騰道最高

題顏氏亭宇

南唐書顏詡居木川雅擅詞翰家法謹肅所居依泉石築亭榭開軒四敞碧鮮

叢遠翠微環列蕭爽之趣杜絕塵囂名士賓于輩各為詩以述其幽隱

園林瀟灑聞來久欲訪因循二十秋今日開襟吟不盡碧

山重疊水長流

下第詩

郡閣雅談云賓于應舉卜于華山縣一年乞一琰凡六擲而得吉兆後果驗每年下第有

詩畧舉於左

蟾宮空手下澤國更誰來

第一舉

水國二親應探榜龍門三月又傷春

第二舉

仙島却回空說夢清朝未達自嫌身三舉

失意從他桃李春嵩陽經過歇行塵雲僧不見城中事問

是今年第幾人四舉

因逢日者教重應忍被雲僧勸却歸五舉

獻主司六舉

登第

那堪雨後更聞蟬溪隔重湖路十千憶昔故園楊柳岸全

家送上渡頭船

主司得詩自謂得賓于之晚後賓于致仕歸連上過廬陵吉守贈詩有今日還家莫

惆悵不同初上渡頭船用此

句

遠樹連沙靜閒舟入浦遲

夏日曲江

簾垂羣吏散苔長訟庭閒

贈徐明府○並詩中旨格

去年曾折處今日又垂條

柳○以下吟窗雜錄

早知落處隨疎雨悔得開時順暖風

花落

千家簾幕春空在幾處樓臺月自明

花落

臘雪化為流水去春風吹出好山來

雪霽

昔日聲塵喧洛下近年詩句滿江南

寄李昉

匝地人家凭檻見遠山秋色捲簾看

永州法華寺高軒○詩話總龜○以上俱

唐音
戊籤

耒陽杜公祠

南遊何感思更甚葉繽紛一夜耒江雨百年工部文青山

當日見白酒至今聞惟有為詩者經過時弔君

杜集附錄

南漢

陳

拙

字用拙以字行連州人唐天祐元年進士第授著作郎後為劉隱掌書記攝觀察判官有詩八

卷

浮世自無閒日月高樓長有好山川

登臨
湟樓

人說洞庭波浪險使君自有濟川舟

送史長沙
俱連州志

黃

損

字益之連州人梁龍德二年進士任南漢主劉龔幕府授永州團練判官累尚書左僕射著有

桂香
集

公子行

春草綠綿綿驕驄驟暖煙微風飄樂韻半日醉花邊打鵲
拋金盞招人舉玉鞭田翁與蠶婦平地看神仙

讀史

逐鹿走紅塵炎炎火德新家肥生孝子國霸有餘臣帝道

真詩真逸卷一
九
雲龍合民心草木春須知烟閣上一半老儒真

出山吟

來書初出白雲扃乍躡秋風馬走輕遠近留連分岳色別
離嗚咽亂泉聲休將巢許爭喧雜自共伊臯論太平昨夜
細看雲色裏進賢星座甚分明

書壁

一別人間歲月多歸來人事已銷磨惟有門前鑑池水春
風不改舊時波

句

傍水野禽通體白飢盤山果半初紅

而今世上多離別莫向相思樹下啼

鷓鴣

機關纔運動勝敗便相隨
忽遇南遷客若爲西入心
往來三島近活計一囊空

三通明主詔一片白雲心
掃地待明月踏花迎野僧

水諳彭澤闊山憶武陵深

金鐙冷光風宛轉錦袍紅潤雨霏微
高齊日月方爲道動合乾坤始是心

俱吟窗雜錄

王

南海人乾亨初舉
進士拜中書舍人

獨不見

日晚宜春暮風軟上林朝對酒近初節開樓蕩夜謠石橋

通小澗竹路上青霄持底誰見許長愁成細腰

鍾允章

其先邕州人徙家番禺登乾亨三年進士與弟有章齊名累官尚書右丞參知政事為宦者許

彥章所誣下獄族誅

絕句

舊業分明桂水頭人歸業盡水東流春風日暮江頭立不及漁人有釣舟

詠射句

金箏離弦三尺電星鶻破的一聲雷

林楚材

番禺人布衣

怨詩

何處期郎遊小苑花臺閒相憶不可見且復乘月還

贈黃損句

身閑不恨辭官早詩好常甘得句遲

錦繡萬花谷前集廿一作句好當甘得味

遲注云林楚闕材字

胡賓王

乳源人

讀書堂石刻句

水向石邊流出冷風從花裏過來香

粵詩蒐逸卷一

譚瑩玉生覆校

粵詩蒐逸卷二

嶺南遺書

番禺 黃子高 叔立撰

宋

周

渭

字得臣桂陽人幼孤長力學工詩時州隸長沙楚與南漢相持渭為廣人俘獲妻子流離韶州

遂為恭城人劉鋹政煩賦重渭率鄉人避於零陵未至賊起斷道絕糧脫身北上建隆初至京師為薛居正所知上書言時務召試賜同進士出身解褐白馬主簿擢右贊善大夫乾德中判興州遷知隸州殿直轉遷殿中丞加監察御史居六年徙知揚州累遷職方員外益州轉運使所至誅奸暴折強貴服辟逆真宗聞其清節召還未赴卒貧不克葬上賻錢十萬召其子建中為乘氏簿

賦得花發上林

灼灼花凝雪春來發上林
向風初散藥垂葉欲成陰
人過香隨遠烟晴色自深淨
時空結霧疎處未藏禽
萋萋何時

植閒關幾日吟一枝如可冀不負折芳心楚風補

壘秀山

平生賦性愛觀瀾今日登臨壘秀山天錫卦爻分象外地
將圭笏出人閒昭州水遶孤城小五嶺山高衆垵難極目
紫宸何處是碧雲深處珮珊珊粵西詩載

贈道士吳崇岳

楮爲冠子布爲裳吞得丹霞壽最長混俗性靈常樂道出
塵風格早休糧枕中經妙誰傳與肘後方新自寫將百尺
松梢幾飛步鶴棲枝上禮虛皇宋詩紀事

郡閣雅談吳崇岳泉州龍興觀道士辟穀多年嘗登松梢禮拜處松枝可六七十尺福建漕使周渭贈以詩太平興國中詔入京

孟歸唐

歸唐湖湘連上人南唐水部郎賓于之子廕授祕書正字吉州民掾歸宋遷大理丞以罪貶袁

州司戶

句

練色有窮處寒聲無盡時

龍袞江南野史孟賓于入江南生子名歸唐少能詩就廬山國學遂得瀑布詩云云時鄰房儒生亦得此聯遂互訟其句助教不能理因送江州各以全篇意勢定之而歸唐較勝大為時人所仰

邵奕

字日華連州人太平興國三年進士第官至右諫議大夫知廣州

遊真祺觀

肩輿迢遞訪遊仙自是山中別有天松影參差籠玉殿鶴聲嘹唳下芝田青蒼巘色臨門外斷續泉流遶檻前便可相從解簪紱時清難戀薜蘿烟

連州志

孟 嘏 字子純連州人 太平興國時

贈史虛

詩酒獨遊寺琴書多寄僧

贈成務崇

同吟碧障前已是十年前話別非容易相逢詎偶然多為

詩酒累早被利名牽幸有歸真路何妨學士元

連州志子純性灑落嘗賦詩贈史虛云云太平興國中
自吉水歸逾年而卒後書生成務崇言廬山與嘏為忘
年交有詩贈務崇云云連人皆言嘏
已卒十餘年矣始知嘏乃尸解也

古成之 字亞夔惠州河源人五季末避地家增城中端
拱二年進士召試除祕書省校書郎張詠帥蜀

辟知綿竹
縣卒于官

憶羅浮

憶昔羅浮最上峯當年曾得寄仙蹤
凭闌月色出滄海歛枕秋聲入古松
採藥靜尋幽澗洗寄書閑仗白雲封
紅塵一下拘名利不聽山間午夜鐘

五仙觀

元元分古觀南鎮越王城五石空留瑞
羣仙不記名丹砂雖久煉雞犬自長生
檻簇鰲頭景門通鶴脰程烟霞隨地起
花木逐時榮古井涵虛碧疎鐘入戶清
荒蕪憐墅色寒溜引秋聲丹竈封苔老
芝田積雨平風光齊嶽麓音信接朱明
願得身從此乘雲到玉京

又

撥破紅塵入紫烟五羊壇上訪仙人
閒自覺無閒地城

裏誰知有洞天竹葉影繁籠藥圃桃花香暖映芝田吟餘
池畔聊欹枕風雨瀟瀟吹白蓮

貪泉

賢良知足辱爲爾戒貪名一酌不能惑千年依舊清深涵

秋漢色冷浸古松聲珍重荒碑在何人曾淚傾

以上增城縣志

廣東通志宋初干戈甫息嶺嶠文風未振每取士合一路以一人薦衆推成之雍熙改元充秋賦督府勸駕詩云寰中有道逢千載嶺外觀光只一人蓋紀實也

懷石樓

相思天一邊知在石樓閒高臥客稀到數峯人共閒仙方

新更試易疏舊會刪

成之遷居增城結廬羅浮讀書著有刪易注疏

好探鼇頭信

時應有鶴還

羅浮山志

遊天通真身塔

潔志登高塔西南對海城一真雖有相萬法本無生梅雨

侵窗冷天風入海清臨回慵更語祖意自分明

河源縣志

吳世範

連州人登咸平三年進士大中祥符間為漳浦令後由太子中舍遷殿中丞詩文甚工今傳二

篇

廖仙巖

治民因得道浮世學應難自是神仙骨非干龍虎丹松篁
排洞罅樓閣倚雲端此日朝真去慚為五品官

白鶴山

靈壇古蹟自來誇四望峯巒錦簇花白鶴何來歸洞府青
山竟日鎖烟霞言尋庭下燒丹竈爭羨天邊泛斗槎我欲

離塵換凡骨願隨風馭到仙家以上連州志

黃仲通

仲通本名正韶州曲江人天聖二年舉進士累遷尚書屯田員外郎中知惠州軍事余襄公其

也甥

惠州野吏亭

危亭治舊基登覽一何奇萬態羅浮景三章宰輔詩嵐光

如畫處霽色乍開時味此休閒趣惟予野吏知石刻載通志金石畧

許

光

字覺之始興人天聖三年進士累官殿中丞遷廣東轉運使

藥洲

熙寧甲寅

花藥氛氳海上洲水中雲影帶沙流直應路與銀潢接槎

客時來犯斗牛

再遊陽春通真巖熙寧丁巳孟夏

壁倚乾寧碣龕籠大業僧七年馳使路兩躡石梯層

被召北歸艤舟琅石遊碧落洞二首

熙寧十年丁巳八月

崖卷層霄闊溪穿碧玉橫銀河一派水終日瀉天聲

玉峯劔不盡滿室碧琅玕太始藏靈氣寥寥五月寒

以上石刻

俱載通志金石畧

南山宣聖廟竊見太守黃公題名有作

千仞巖巖擁白雲不教紫翠落塵氛長留雨後凭欄意堆
疊清光伴使君

又

數仞環分一徑深講筵深處暮烟沈金鈴木舌新揚意忠

孝昭昭刺史心

英德縣志

湖上十亭

昔年曾看海陽圖巧狀湖山恐見誣今日登臨真可愛畫

圖翻覺少工夫

連州志二十一

連州志古蹟湖上十亭在海陽湖上唐刺史劉禹錫建日吏隱亭曰切雲亭曰雲英潭曰真覽亭曰裴溪曰飛線瀑曰蒙池曰芬絲瀑曰月窟曰雙溪元和間裴休以御史坐事貶連州嘗與禹錫相倡和為海陽十詠宋運使許彥先有詩云云今圯

舜井斷碑

在隨州碑字漫滅惟碑陰有五大夫字相傳秦時碑舊在舜子巷草間今在漢東閣

下

一千二百餘年外萬古銷磨不可尋舜子井泉誰記古隨

人間巷祇如今隸書字雜科蟲體氏爵名存樂石陰登覽

時來醒醉眼也勝俗物在園林

方輿勝覽

宋詩紀事三十四載此作許覺之
以為元祐閒人蓋卽彥先詩也

潛研堂金石文跋尾續第四許彥先藥洲詩跋云彥先
字覺之元祐二年丁卯知隨州得漢碑于洲之舜子巷

徙置後圍刻詩一篇於碑頌蓋嗜古而好事者也王荆
公集有送許覺之奉使東川詩愚按荆公集尚有次韻

覺之七律一首其
原詩不可考矣

羅孟郊

與寧人天聖八年舉進士第
三累官諫議大夫翰林學士

京中懷歸

一自題名後思歸何日歸雖然著宮錦不及舞斑衣故里

桑榆晚他鄉雨雪霏庭前停玉軫目送雁南歸

徐

信

保昌人皇祐
王辰進士

句

平地風烟飛白鳥半空雲木捲蒼藤

甘露寺

保昌縣志信少力學工詩文蘇軾謫惠州見所作
甘露寺詩云云軾乃以橫字易飛字信甚歎服

李嚴字子章樂昌人登皇祐壬辰進士授象州知州
官至朝奉郎隨余襄公靖平儂智高有功文章

節義與兄
渤齊名

冬宿別業

移榻三冬暮聯牀半夜寒不眠霜瓦曉細語壁燈殘雁澤

棲何定鴿原且自寬鴻飛非所羨聊托一枝安
廣東詩粹

玉井雲根

雲根一竇發清瀾紺字何須結綺欄夜霽定知奎斗徹浪

翻應有蟄龍蟠支機水拂銀河湧海眼秋清寶鑑寒自是

源泉開淑氣還看雪液更漫漫
英德縣志

李渤字子文樂昌人嘉祐二年進士官至朝奉郎知白州

武陵

扁舟初汎入瀧船隱約乘槎上漢年岸狹束成三級浪山
高分得一毫天掃開盤石那無酒流出桃花恐有仙青史
若能留姓字直須來此釣溪烟

韶州府志

韶州府志 渤海世業儒有聲嶺表郡人號李夫子嘗
試南昌作聞伯夷之風頑夫廉賦人稱為李伯夷

張漸 始興人熙寧丙辰進士歷官朝請大夫著有沙田集今不存

崇寧乙酉元己率同僚脩禊于七星巖

妙意其誰運大鈞玲瓏奧室闢天真斗臨平地精初結龍
去丹霄穴未湮洪造故教虛待物良辰贏得樂同民我來
禊有自然興豈羨蘭亭曲水濱

石刻在高要七星巖今存載通志金石畧

譚粹 始興人唐循州司馬誨之後皇祐壬辰進士侑之子熙寧初知惠州有美政嘗輯羅浮志序之

傳以

景泰禪閣

二山相傳成禪閣出山半仰觀青冥逼俯見白石粲錫杖
湧玉泉鐵橋通銀漢巍然槩諸天恍若登彼岸無人解菩

提松濤自昏旦

羅浮山志

建中靖國辛巳八月十日獨遊碧落洞遂成拙句

碧落嵯峨石室幽到難嗟我未嘗遊兩崖卷束雲華滿一
水通流秋色浮宛矣壺中延日馭凝然乳竇滴泉旒徘徊
注日孱顏久疑有真仙在上頭

望仙亭成再書一絕

一亭新構聳崔嵬水墨屏圖四面開洞口白雲無鎖鑰州

人尊勝任頻來

重建南山亭榭輒成小詩迺建中靖國元年孟冬五

日也

南山亭榭復修完上枕蒼崖下碧瀾此景詩人吟不盡丹

青圖寫也應難

金石畧十一

鄭敬義

字上仁英德人熙豐舉文科歷官潮陽令

望仙臺

一亭新構聳崔嵬水墨屏圖四面開洞口白雲無鎖鑰世

人尊勝任頻來

英德縣志

梅

蟠

字子升歸善人元豐八年第授迪功郎鄉人稱曰梅夫子

何仙姑祠

昔聞謝自然今祠何女仙昌黎久不作奇事相留傳當其
始生時紫雲光燭天煉服雲母丹紅玉飛瓊烟窈窕顏不
老霞帔尙翩翩琪花露含藥瑤水月在蓮恍若坐深閨真
息長眇綿左攜魏夫人右挾夏嬋娟不入天台路永同龍

漢年

羅浮山志

登第歸日句

滄海有風鵬翼健青雲得路馬蹄輕

阮通志本傳

李熙載

字伯先德慶州人元豐八年進士元符間爲廣南西路計度轉運使官至朝請大夫

九星巖

今屬羅定州東安縣

巖穴玲瓏幾度秋簪峯高插聳鰲頭化人舊有阿羅漢喜
客今逢老比丘石罅日聞甘露滴山閒時見慶雲浮靈巖

特為南鄉設從此生賢繼不休德慶州志

句

一門萃忠孝竹帛寫家聲贈伍仕階○德慶州志

嚴高要人知韶州

贈外舅伍奉議

五馬歸來林下清挂冠省悟著禪扃仙遊雙履同西去衣

鉢傳來千佛經德慶州志

德慶州志伍仕階州之晉康人累官奉議郎知封川秩滿挂冠東歸性耽元寂自適其志其壻嚴諷知韶州贈以詩云云其子孫俱以忠孝顯運使同鄉李伯先贈詩亦有一門萃忠孝竹帛寫家聲之句

陳希伋字思仲揭陽人元豐間兩冠鄉書元祐六年舉經明行修時賜第者三百四十六人希伋為第

一後知梅州軍事所著文四百餘篇號揭陽集

鳳棲樓

千載傳聞孰是非高梧修竹晚風微欲知古寺曾棲鳳樓

殿今無燕雀飛

揭陽縣志

嚴武

連州人元祐辛未榜進士累官朝散大夫知南恩州

上郡守

一陣春風散曉霞使君千騎擁高牙太平天子加崇重見

說瀛洲已草麻

連州志本傳

劉允

字厚中海陽人紹聖四年進士初任循州戶曹改知程鄉權知化州後除新循二州不赴卒于

家

韓山

惆悵昌黎去不還小亭牢落古松閒月明夜靜神遊處三

十二峯江上山

海陽縣志

石汝礪

字介夫號碧落子英德人五經多有講說於易尤契微妙晚年進所著解易圖於朝為王荆公

所抑蘇東坡謫惠州相遇聖壽寺談易大異之

竹浦漁歸

釣罷收綸日既殘扁舟一葉解登灣長歌款乃乘風去鳴

櫓咿啞趁月還翡翠躍飛紅蓼內鴛鴦驚起白蘋間奔馳

馬足車塵者回首烟波羨爾閒

英德縣志

馮安上

字康國寅子英德人登政和二年進士官吉州別駕尋改廣州權知梧州軍

留題南山聖壽寺

特起孤峯聳白雲又環雙澗隔紅塵枯崖有字唐元傑古

廟無碑舜二臣草木怪靈千種藥山川濃秀四時春邦人

競效封人頌寺額金書聖壽新

凌烟嶂

南山山下多佳石過眼欣逢詩思得最憐小嶂隔窗前透

出烟光露秋碧

英德縣志

馮

晦

字文顯英德人寅之族子

南山留題

南山之景幽且清臺亭上下知幾層王吳妙手寫不得若

非造物其誰能

石刻載通志金石畧

張

夔

字致堯饒平人登政和八年進士初宰茂名旋判廉州遷知新州著有祿隱集

句

慎勿與人交水火好尊名節重邱山

饒平縣志本傳夔五十登第七十致仕卒年九十有三
子昌裔通判容州夔嘗示以詩云云後改瓊州持身謹
飭不替
父風

身詩身逸卷二

譚瑩玉生覆校

粵詩蒐逸卷三

嶺南遺書

番禺 黃子高 叔立撰

宋

張宋卿

字恭父博羅人紹興丁丑以春秋魁南省擢進士第由校書郎出守肇慶卒于官

天漢橋

一派銀河木杪飛碧雲飛處彩虹垂免教靈鵲長填石來

看天孫出嫁時

館中憶羅浮寄留仲至曾元功

當年南澗弄泉流妄起功名分外求羣玉峯頭今倦立卻
煩清夢到羅浮

春樹江雲我所思平生意味不差池如何驛使行千里不

把梅花寄一枝

以上三首
博羅縣志

惠州府志張宋卿母方娠父夢人贈詩曰白蓮池上白蓮兒一舉成名天下知四十二年閑富貴滿船空載月明歸未幾誕宋卿長以春秋為天下第一歷官肇慶守卒于官年四十二舟還初殯僧利名白蓮軒後葬羅浮麻姑峯下前有小池號曰白蓮池乃知夢中之句悉合也

廖

字季邛連州人紹興乙卯榜進士歷官廣南西路提刑

虎跑泉

真馭遺蹤古寒泉瀉石清養源人莫測流潤濟蒼生

連州志

遊七星巖

斗峯遙憶舊崧臺為勸農耕特地來短李高名光翠壁偽

劉陳迹沒蒼苔洞天日永風埃淨巖壑雲收霽色開好景

最宜供宴賞操觚欲賦媿非才

嶺海名勝記

陳煥

字少微博羅人紹興中特科調高要簿

梅花邨詠梅作

雪裏溪橋獨樹春
客來驚起曉粧勻
試從意外看風味
方信留侯似婦人

遺衣壇

一點殘燈照夜闌
洞深雲氣逼人寒
仙翁從此乘鸞去
不見遺衣見古壇

黃龍洞口道人送茶及筇竹杖

露泣新芽九節筇
芽如雀舌節如龍
烹來習習風生腋
拄

上羅浮第一峯

俱博羅縣志

茶庵觀茶

脚底晴雷殷殷過浮山四面布干戈鎗旗不染陰山血留

與人閒戰睡魔羅浮山志卷七之十八

宋時彥樂昌人隆興元年鄉貢

呈秀亭

南山亭榭復修完上枕蒼崖下碧瀾一景詩人吟不盡丹

青圖寫也應難英德縣志

曾躍鱗字子龍陽江人淳熙五年進士終監察御史

遊王母岡

岡空雲散淨如銀石磴層層接九宸翠竹影搖湘浦夜碧

桃香藹武陵春但看此日燒丹竈不見當年駕鶴人遊徧

瑤池歸去晚一聲長嘯月華新嶺南詩鈔

聞西浦漁歌作

西浦鳴榔下釣磯
歌聲款乃送斜暉
扣舷互答驚鷗夢
拍手歡呼看鷺飛
山接素琴仙子過
洲連青草使君歸
海天空闊家長在
一任蘆花雪點衣

粵大記本傳

李肖龍

字叔膺增城人淳熙中舉進士攝長樂縣事官至朝議大夫入元不仕

便民詩上顏正叔宣慰

枯苗一著雨田疇綠
芊芊蝥蟲一逢春
窟穴聲闐闐餘民
望小定甚於饑渴
然昔何好弄兵
今何知服田急流
無住魚睛空有飛鳶
干戈未肯息百里
無人烟去年科徭
重剜瘡在眼前父子
不相保悲泣空自
懸新官榜往催觀
者塞市廛全活數
萬衆此恩大如天
人生能幾何飲啄
皆前緣

聚水盈科進缺月及時圓唯謀官職高未必子孫賢有意

行王道願言書七篇

增城縣志

增城縣志肖龍性苦卜急嘗製漆脾刻銘以繫於肘倣古韋弦之義舊志載其銘曰怒氣炎火焚燎自傷觸來

勿競事

過清涼

劉

鎮

字叔安南海人嘉泰二年進士學者稱隨如先生有隨如百詠刊於三山

春暮

春至又春暮閒心成古心花光隨雨薄草色共烟深粉蝶
稀狂影黃鸝送好音餘芳留不得還共夕陽沈

山中早行

巖鐘將報曙遊子已登途野火時明滅殘星似有無

八歲女善棋

慧黠過男子嬌癡語未真無心防敵手有意惱詩人得路
逢師笑輸機怕父嗔汝還知世事一局一回新

贈隱者

夫子生東野經年不到城愛吟無俗趣貪畫得閒名荒徑
侵山影虛堂出燕聲我慙為謫吏泉石負幽情

以上俱後村千家詩

挽崔菊坡句

始終無玷缺出處最光明

崔清獻言行錄內集

太姥山

滾滾千山入馬蹄出遊回首日平西人從杜宇鳴時別天
向蒹葭靜處低白鳥得魚閒釣艇黃蜂抱藥鬧花枝好將
太姥山前路付與孤猿自在啼

福建通志七十七

嚴子陵釣臺 原注劉叔安宋人號隨如居士

漢業重恢百戰閒君王側席嘆才難故人可是擎天手官

放桐江把釣竿 釣臺集

陳應辰 字清溝東莞人嘉定十二年鄉貢特奏進士連州推官兼擢僉判官至通直郎

青紫峯

鐵壁嶙峋構小亭瀟然雲棟接風櫺烟光橫抹半峯紫山
色不磨千古青老去久無金馬夢歸遲應愧草堂靈明經

拾芥成何事得似朝來對翠屏 嶺南詩鈔

趙崇垓 字德暢太宗九世孫家南海嘉定十年蔣重珍榜進士權端州郡貳

遊七星巖和曾景亮同年

地本乎陰竅本空巖名以斗古傳風世人適意爲行樂造

物何心著巧功弱水蓬萊仙境界石橋方廣佛神通達觀

不作塵寰看笑挹天漿樂在中

通志金
石畧

吳文震

字欲發番禺人紹定壬辰進士試鬱林州司戶
權尹又在南恩州司法授新昌通判知歸善縣

尊倅欽州攝守全州
湖廣春陵咸有惠愛

題半月巖

口靈通一竅如月未全盈外口山河界中涵蚌蛤精銀潢

斜口斷玉斧半脩成莫訝平分破難虧半體明

靈山
石刻

陳昌言

海陽人淳祐中進士
仕由宣教郎至制僉

鄴都

山勢崔嵬望太行星輶迢遞過臨漳華林園廢花爭發銅
雀臺空草自芳何必三分誇霸業獨憐千古擅文章生逢

亂世終非幸疑冢纍纍挂夕陽

潮雅拾存

鄭玠

字太玉滇陽人嘉熙初以上舍對策極言天下事李昴英亟稱之淳祐甲辰釋褐知博羅縣事

擢太府寺丞以去

觀源洞 有序

唐時有人避地入觀源洞見石室壁刻稚川詩云松門石逕茸芳草落花滿院香沈沈及再觀不見其處恨不見其全篇玠為足成全云

麻姑峯頭黃鶴歸稚川竈上丹霞棲寒後嘯木山月白正是仙人朝斗時壺天景象何靈杳松門石徑茸芳草落花滿院香沈沈緣似劉郎應解到碧溪數聲連暮鐘夢回已

覺松窗曉

白雲菴

羅浮山頭老松樹中夜長吟送風雨病夫幽獨枕書眠靜
聽松聲默無語壁間畫像對書燈耿耿殘油下饑鼠夢覺
踟躕不成寤要伴禪和聽粥鼓

初至羅浮

長說羅浮欲到難清遊今作字民官分明蓬島三山色占
得飛雲六月寒寶軸幾函青貝葉玉蘭無口碧琅玕此來
更擬詢遺事記與靈蹤石上看

丹竈

靈跡曾傳葛稚川至今丹竈尙依然誰云碧海三山島別
是朱明一洞天龍出玉京成往事鶴歸華表是何年塵埃

多嘆空回首到得仙山自有緣

葛仙行祠

身爲俗吏趨行部手爇名香祝有年
五色雀飛應薦祉七星松古自通仙

寄逍遙子

自從夫子仙山去聞說山中分外清
半夜洞天松月白野猿吟和讀書聲

以上俱博羅縣志

茶菴

道人宴坐碧山阿啄木敲門擬客過
吾境本無妖魅事日長翻有睡爲魔

活水仍將活火煎茶經妙處莫虛傳
陸顛所在閑題品未

試羅浮第一泉

嶺海名勝記

鄭康佐

羅浮

秦華端培塿羅浮霄漢鄰
俯視雲烟飛冠蓋摩星辰
凝神想至道窈窕難具陳
未究訪安期竚立空逡巡

卓錫泉

大士西方來誅茹老幽麓
振錫風雲上飛泉湧山腹
一泓自清甘千里田疇足
源深而流長何必貴川瀆

蓬萊閣

獨占林泉勝金碧耀青冥
凭闌俯八極縹緲降玉京
羣仙日往還簫韶聞九成
鸞鳳爲君導恍然遊蓬瀛

鐵橋

青蛻跨兩山龍鳳互撐拄頡頏來雙鳧孰云通步武壺中
杳靄閒遐想神仙侶夢錫九霞丹翩翩遊紫府

水簾洞

仙人開碧戶玉溜瀉潺淙飛流散珠璣灑落隨天風三伏
不知暑有如水晶宮平生邱壑性歌嘯翠微中

石樓

危橋橫碧漢隱約山之巔下窺滄海大宇宙相連延天風
吹寒水恍惚遊飛仙飄飄吹凌虛還爲塵俗牽

夜樂池

清籟起虛壑笙竽驚夜眠音調自諧暢恍如奏鈞天真仙

聚臨賞鸞鶴舞蹁躑凌晨日杲杲濯纓弄潺湲

鄜仙騎牛石

橫笛騎青牛巖扉自開闢倏然乘風馭雲收煙滅迹真人
不可見空遺舊泉石我來獨徘徊日暮千山碧

葛仙祠

乘雲朝太清烟霞鎖故宅逍遙十洲上遂與人寰隔泉石
獨泠泠遺竈粲朱碧欲追汗漫遊安得生羽翮

黃野人庵

至人隱洞天蒼苔滿澗石長嘯響空巖咫尺雲霧隔白鶴
未歸來何以慰晨夕流泉自涓涓秋宵山月白

白雲庵謁先君寺丞詩

清癯野鶴姿問道羽衣客白雲濯飛泉青霞窺裂石閒猿
嘯清曉藥鳥鳴日夕幽人不可見百拜訪遺跡

李夢呂

鳳凰谷

羅浮絕頂凌蒼穹五雲飛繞蓬萊宮金烏玉兔出西東鐵
橋萬丈橫霽虹臥踞虎石龍蟠松異香不動烟騰空餐霞
飲露凡聖同水簾碎玉聲玲瓏桃花流出片片紅碧梧翠
竹環三峯天邊鳳鳥來雝雝仙風吹入石洞中我欲呼之
儀九重歌舞聖化同天功

羅浮山志

陳大震

字希聲番禺人寶祐元年進士守全州元兵入境遂自劾罷歸端宗入廣召爲尙書吏部侍郎

不就宋亡元錄舊臣授司農卿廣東儒學提舉以疾力辭自號蘧覺先生著有文集數十卷今不存

疾力辭自號蘧覺先生著有文集數十卷今不在
哭陳推官應辰

海濱推老大粹行比珩璜

廣州人
物傳

紀應炎

字伯明遂溪人寶祐四年進士初
試澄邁主簿後咸淳中宰南海

書桃符句

三年南海清心坐一任東君冷眼看

遂溪
縣志

蘇良

字堯臣番禺人寶祐四
年進士知肇慶府事

咸淳乙丑良月同張彭二寅契遊七星巖因以紀勝

杖履追隨入翠蓬玲瓏一竅徹心胸山羅斗宿英靈萃地
鎮龍潛氣勢雄碑蘇猶涵周子澤澗松仍有老包風歲寒
共約吾三友要把清規踵二翁

再詠星巖

曾聞媯氏補天漏也記春秋石隕星却訝端巖星錯落何

時漂墜數峯青二詩並刻一石在高要七星巖今存載通志金石畧

李春叟字子先東莞人寶祐初薦授惠州司戶尋除肇府司理遷德慶教授歸復除軍器大監不就賜

號梅外處士

送熊飛將軍赴文丞相麾下

龍泉出匣鬼神驚獵獵霜風送客程白髮垂堂千里別赤
心報國一身輕劃開雲路衝牛斗挽落天河洗甲兵馬革

裹屍真壯士陽關莫作斷腸聲嶺南詩鈔

翟龕號遜菴東莞人景定二年領鄉貢咸淳二年再舉元兵入粵嘗攝邑簿宋亡隱居不仕

崔清獻公祠堂落成

象笏猶存舊典型魏謩亦此振家聲矧今故第堂堂復不

日新祠恰恰成嘉定閒關全蜀險端平倉卒護鄉城此功
此德垂千古自有人人香火情崔清獻公言
行錄外集

張鎮孫

字鼎卿南海人咸淳七年進士第一通判婺州

水簾洞

在白雲山

峇峩仙境倚層邱百尺泠泠瀑素流春長綠莎成繡幕夜
留新月作瓊鉤澗邊雲護千年韭巖底涼生六月秋欲訪
安期何處覓藥爐丹竈且追遊番禺縣志

謝恩詩

當宁宵衣務得賢草茅何足副詳延天人要語垂清問仁
敬陳言上奏篇媿乏謀猷裨乙覽忽驚姓字首臚傳乾坤
大德知難報誓秉孤忠鐵石堅雙槐
歲鈔

和御賜詩

聖主遊心六藝文先皇成憲自常遵
天人親屈九重問嶺海同歸一視仁
已忝臚傳魁衆俊復叨燕衍逮微臣
終身

祇佩丁寧訓遠到功名願自珍

五山志林

御賜狀元以下詩云臨軒再策豈虛文要語詒謀敢弗遵昭格天心惟至敬封培邦本在深仁詳延喜見洋洋對來譽知爲蹇蹇臣始進便當思遠到會須華國有儒珍○此詩亦見五山志林

白雲對月

萬山飛翠映瑤空一抹晴霞淡復濃
何意海風吹不斷歸鴉飛帶過前峯

夜過白雲話別

江城話別思依依天遠山青入望微
正好樓頭共明月可

堪遙對白雲飛

遙看天際白雲浮渺渺西飛誰與謀歸去扶溪溪水闊秋
來還上越臺否

日乾夕惕自惺惺切實工夫在性情千古相傳真要法聖
賢元共此心靈

聖賢今古在吾人敬義功深德自鄰莫嘆桃源仙迹杳杖

藜隨處武陵津俱嶺海名勝記

曾宋珍新安人淳祐九年己酉賦舉登咸淳十年甲戌王龍澤榜第二甲任至迪功郎

雲溪寺

溪水年年自淺深□□□□□時陰溪山好處劃開□□

水□□□□□新安縣志

新安縣志雲溪寺在縣西四十里歸
德場參里山之麓今改為萬壽寺

此詩載康熙廿七年靳文謨所纂縣志字多漶滅至
近日新修之志則並其詩削去矣當覓舊本補之

陳

紀

字景元東莞人咸淳九年鄉貢宋季同兄
庚借隱與趙必瑑歌詠著有越吟斐稿

甲辰元日

屋角雞聲一歲分起搔吟髮惜芳辰江山有恨英雄老天
地無私草木春柏葉又傾新歲酒梅花同是去年人東風
著物能多少寫入清詩句句新

嶺南詩鈔

早秋有懷寄趙華顛

一葉井梧落微涼生瘦藤老兼秋共至衰與病相仍砌近

蟲號枕簷疎雨翳燈熏爐對經卷清似住山僧

東莞縣志

夜夢遊野人家萬竹蒼寒老翁款留意甚真予題詩

贈之一聯云與誰共住只明月所可論交惟此君覺
乃足成亦夢中意也

一徑蒼寒長綠筠雞聲人語隔林聞與誰共住只明月所
可論交惟此君世事乘除天已定人生勞逸念中分卜鄰
倘許通來往分我南山一片雲

廣東詩粹

劉登辰

字規甫東莞人咸淳九年鄉貢入元不仕

赭衣春

赭衣春永巷酸風起暮杵聲聲碎妾心妾兒痛隔三千里
灞水歡迎骨肉恩子母再見無由緣誰將鳩羽飲龍子晨
獵上林如意死妾耳縱能聞妾目那能視妾口縱能言妾
足安能履白日改色天容愁未央宮中桐葉秋堂堂豐沛

龍準公三尺造漢烹英雄擊布歸來尙無恙預置股肱如

指掌明知鷲勃可安劉何為存妻子母無良謀廣東文選

馬南寶香山景炎二年端宗航海過邑獻粟千石拜權工部侍郎宋亡後莫知所終

感賦一作弔祥興帝○廣州府志作哭祥興帝

翔龍宮殿已蓬飄此日傷心萬國朝日擊厓門天地改寸

心難與夜潮消廣州府志寸心作壯心

黃屋匡扶事已非遺黎空自淚沾衣衆星耿耿滄溟底恨

不同歸一少微廣州鄉賢傳

宋詩紀事載此僅四句蓋從廣東通志錄出者又云宋亡於厓山被執死之不知何據

游元興寺

坐閱人間幾劫灰試從清淺問蓬萊此山此水自古有是

佛是仙何處來

廣州府志

劉玉真

東莞人景炎末熊飛兵敗避亂鄉曲入元不仕○廣東文選作劉玉

贈內

春風休記舊繁華舉案園林樂事餘月引池光歸座榻雲

含花氣入窗紗鹿門本是龐公宅栗里誰尊舊令家相對

莫論終歲計酒狂詩癖自生涯

廣州府志

劉宗

東莞人

書懷

東莞縣志作致喜亭詠懷

天末涼風吹白雲漸看長晝少炎氛滿庭慈竹秋陰合夾

岸枯荷夜雨聞漂泊鄉關新避寇荒唐客夢舊從軍起來

極目西山望故里松楸悵夕曛

嶺南詩鈔

藍

奎

字秉文潮州程鄉人
第進士官郡博士

句

嬾思身外無窮事願讀人間未見書

廣東通志○
宋詩紀事

蔡蒙古

程鄉人應童子科賜進士授韶州
司戶兼司法權梅州簽書城守死

陰那山

宮闕空懸勝絕奇天然泉石畫中窺五峯指月攢寒玉二
水流雲漾碧漪魚鳥身如遊極樂猿猴心似發菩提沈沈
鐘鼓僧閒寂客亦忘言自得之

梅江晚泛

罷讀出江岸江波滾滾來呼舟閒打槳載月二更回

何處吹橫笛蕭蕭荻葦叢徐看釣艇出蓑笠一漁翁

遊王壽山

王壽山頭石徑斜不知何處有仙家
烟霞踏遍芒鞋破一

路春鳩啼落花

俱潮雅
拾存

蔡

郁

字西野蔡元定四世孫咸淳九年官雷州司理宋亡家于東莞

奉寄文丞相

嗟哉此綱常一朝已散失
臣豈無賢良君豈有慚德君臣
義未明大道致閉塞
誰實篤忠貞矢志不可屈
先生真英豪提戈呼叱咤
一心收桑榆戎行瞻黼黻
開關五嶺南誓師存百粵
仍有田一成足以張征伐
南陽戴真人足以興漢室
天道豈無知爲此冠裳慚
昨聞戰城南王師奮鐵鉞
萬馬似羣羊鬪敗鼓聲竭
百年養士恩報之在朝夕
多慚

遲暮身涕淚望鄉國

廣東文選

何文季

字子友東莞人嘗從李昉英遊仕於宋季後棄官歸匡門之變慟哭成疾而卒

寄陳赤嵌

英雄空有淚沾襟
千古興亡感慨深
邱壑正多亡國恨
干戈消盡讀書心
容身天地生何補
入眼風霜老不禁
却笑紅塵知退晚
能教早計臥山林

寄懷

衣冠不忍墜家聲
風雨瀟瀟雞自鳴
身似孤蓬隨地轉
家無長物帶書行
荒涼松竹鄉心外
淡薄虀鹽世味輕
幸有田疇堪料理
何如買犢且歸耕

送黃坡峯

浮萍浩蕩夾桑榆茅屋田園狐兔墟拾橡豈能饑杜甫鬻
車終不困相如子規枝上他鄉月白鶴峯頭處士廬三徑
雖荒歸亦好筆耕還有腹中書

寄彭教府

食薇已愧首陽人官學揚雄作美新滿目山河長是淚窮
崖草木不知春狂來自與白雲笑老去從教俗子嗔湖海

論交無久近相逢同是漢遺民

俱東莞縣志

廣州府志何文季字子友志尚卓越學行閎整嘗從李
昂英遊仕于宋季後棄官而歸及厓門之變慟哭成疾
其詩有滿目山河長是淚容身天地生何
補之句臨終戒子孫毋出仕著有蘭齋藁

趙善璫

太宗七世孫家南海

餞陳市峯之廉泉

桃源渺何處夢短到家難不辦一邱費猶爲九品官鶴嫌
新俸薄鷗訝舊盟寒附翼攀鱗事書生不敢干

四朝詩

粵詩蒐逸卷四

嶺南遺書

番禺 黃子高 叔立撰

元

吳正卿

字素臣號太素遂溪人化州路學錄赴延祐丁巳湖廣鄉試後期授平湖書院山長歷任至南

寧軍知軍致仕元統間嘗為合浦臨桂二縣尹海北廣西兩憲交章舉入風憲其薦刻有曰人材國家之元氣風紀之耳目故必元氣充而耳目明人材得而風紀振以臨桂尹贈其父為海康尹時人有詩賀之曰未饒官貴文章貴不但親榮閭里榮青史舊書吳太守素臣新傳左邱明其父諱朝進字隱賢號月軒隱居不仕以子贈官時年八十一故其春帖有曰兒輩功名來鐵定老夫安樂直錢多壽八十五而卒素臣壽七十五致仕時已重聽憲副盧嗣宗知其名安車迎以賓禮延至郡庠從容以灰置盤中手書與之語竟日其見重于時也如此

丁巳赴湖廣鄉試曉發城月驛待友人周景沂不至

詩以督之

畫角聲殘月影橫鄰雞多事管人行
灑杯滿引防嵐重新句慵編愛駛輕
一宿蘧廬仁義熟三生敗石夢魂清
故人不致予懷渺長笑出門天地明

山邨卽事

青山歷歷水粼粼望眼空明詩料新
雅背日妍初過雨馬蹄風軟不驚塵
饌無肉味知城遠鄰有書聲愛俗淳
明日江頭重問渡野人笑我是知津

元詩選癸之已上二十八

王景賢

字希賢海康人由邕州路教授陞慶遠天河縣尹仕至靖江路推官致仕希賢有文學善詩至

治癸亥

文宗潛邸于瓊因獻詩為所嘉賞手書愚谷

二大字賜之天歷中復有六花宮袍之賜故其詩曰

今日所蒙稽古力

自天而下拜恩榮

清貧

錯騎黃鶴出烟蘿借得容身燕一窩仁義中天行日月是非平地起風波黃蘗有味輕紅膾紫綬無功愧綠蓑金塢銅山招禍敗清貧兩字值錢多

老儒

狗監無人薦子虛無端歲月歎居諸遍觀歷代無窮事讀盡平生未了書早夢科場嗟已矣晚從學校賦歸與清晨口授兒孫罷時向窗前剔蠹魚

老將

瀟瀟夜雨泣金槍夢過交河古戰場醉誤臂鷹呼走卒閑思調馬扈先皇黑山戍後田園廢青海歸來歲月長日旰

西京初試獵猶存矍鑠一分狂

元詩選癸之丙五十七

李震器

倘驛人至治閒在乾寧訓轉本學諭應湖廣鄉試中式至元閒陞廉州學正中式湖廣者元至

治閒廣東合試湖廣故也

上廉訪司

心持藻鑑手持衡明察秋毫判斷平節操風霜雪松勁襟
懷冰月驛梅清雲開霧捲星河遶雷厲風飛海嶽驚倘為

儒流堅砥柱迴瀾一力賴宗盟

澄邁縣志

蒲里翰

字文淵南海人泰定丁卯進士第至正初由漕運副使知溧陽州後擢雲南廉訪司僉事祀溧

陽名宦

遊嵩嶽

嵩嶽巖前鐵作橋重樓朱宇隱層霄道人步月拾瑤草童

子倚雲吹玉簫春滿石壇遲晝景龍藏金鼎長丹苗苦

少室山前路何許高人索價饒嵩山志

通志選舉蒲里罕南海人至元中進士子按溧陽名宦
列傳蒲里翰字文淵其先西域人宋末祖魯尼氏流寓
廣東至翰登泰定丁卯進士疑通志失於考訂此詩載
嵩山志藝文亦載淵鑑類函二十七里又訛作理要之
蒲里罕與蒲里翰蒲理翰只
是一人其為粵東人無疑矣

遊嵩山

名山到處駐征駢來訪幽棲杜德機雲蓋浮邱千歲井烟
籠玉女五銖衣唐碑猶有丹砂頌漢室全無青鳥飛風卷

長松發清嘯珮環聲響九天微

元詩選癸之癸上六十一載此云見
李伯輿文翰類選大成亦作蒲理翰
楊宗瑞揭陽人泰定四年進士官至
翰林侍讀學士○邑志無傳

茂林

野水舟橫行客稀
溪雲斷續樹參差
南來北去去年年
事歸

鳥巢林只一枝

揭陽縣志

梁全

字伯謙德慶州人登至正甲午鄉薦乙未副榜終太平路同知封敦武校尉

重陽登香山

秋風此日洒衣裳
與客登臨載一觴
好景不妨終日度
黃花尤勝去年香
泉飛澗石聲何響
步入松關路轉長
覽勝

憑高清興發洗歌一曲羨高強

德慶州志

六湖塘見春雁

蘼蕪綠長香簇簇
雙雁忘機相對浴
東風何事不歸飛
應念江南春草綠
燕山密雪正茫茫
况有桃花水滿塘
畢竟

不如歸去好楚雲湘雨是他鄉廣東詩粹

戴元字貞甫德慶州人至正間以鄉薦授封州判官

三洲巖

幾泛仙舟訪洞關弱流原不隔塵寰書臺露冷人何在丹

竈烟消鶴自還洞口碧桃春爛漫崖邊瑤草日斑斕我來

檢點浮生事頓覺壺天日月閒德慶州志亦載元詩選癸之巳上四十七

麥澂字口口南雄人至正間知藤州

谷山在藤縣城北

層巒疊翠瘴江湄水色林光雲起時雲鶴自閒春自老箇

中風月幾人知

東山

東山雲斂碧天開
月色蒼茫海上來
風露滿空清似洗
一庭光彩轉瑤臺

石壁山

高十餘丈下臨大江是多松檜

千尺丹崖削石屏
波光倒樹礙雲行
何當借我烟霞榻
臥聽泉聲看月明

赤水峽

兩岸壁立一水中流樹木蔚然嵐氣朝夕不散

水氣初升雲氣浮
山林不辨鳥聲幽
天風吹入三竿日
草木依然水遶洲

藤江

桃花浪暖錦鱗肥
白髮漁翁罷釣歸
柳底繫船篷底坐
滿前鷗鷺已忘機

鴨灘

中流亂石水交加
滾滾寒聲帶雪花
霜月不隨流水去
只

將秋色伴漁家

元詩選癸之
已上六十二

李

鼎

福明名鼎以字行樂昌人少慷慨有志畧至正
閒流寇猖獗福明以身爲民保障僉憲劉鶚薦

於朝授乳源縣主簿等陞乳源
令卒于官子茂有名隱居不仕

登臘嶺頂

披雲千仞頂縱目萬重山
歸鳥來三楚飛霞出百蠻
南經

秦代郡北是漢時關
今古興亡事紛紛一夢閒

春日山村漫興

何物清人思西山對古原
漁樵春草路雞犬夕陽村
水動

烟霞色沙留杖履痕
向來無限意一醉任乾坤

廣東詩粹

戴希文

名昌以字行海陽人博通經史不樂仕進敦行誼鄉人宗之至正間總管王翰治潮值寇賊搶

攘學校廢弛乃聘希文主教學著有航錄行世

鳶飛魚躍亭題句

亭元王翰建正統三年知府王源修在韓山書院前

西郭雲連沙樹晚前池風薦水花涼

海陽縣志

陳穎慶

東莞人官訓導

送徐子貴南恩州學正

筆牀茶竈米家船去結香芹碧藻綠高士舊聞人下榻冷

官誰謂客無羶詩成蜃氣樓臺外日送鳶飛潦露邊往事

沙蟲堪一嘅海靈山下浪浮天

宋舟師覆於此嶺南詩鈔

李璞

字德秀端州人任梅州推官

石室

天然石室壯端州非假神輸鬼運謀三四點星無晝夜幾
千年水自春秋但知玉乳涓涓滴不覺紅塵冉冉流直上
斗魁臺上望乾坤浩蕩白雲浮

元詩選癸之
丁四十七

龔煥文

增城人

崔清獻公祠樂辭

瞻箕尾兮概光蒸沈水兮奠桂漿
惝清風兮穆穆公欲下兮回翔揚之宮兮益之閣
終非吾土兮不能以樂鏘劔佩兮歸來故居兮如昨
俎臚兮潔尊春秋兮公有孫時無往兮不復聊逍遙兮盤桓

右迎神

府潭潭兮廟奕奕公端委兮闕恤鼓奏兮佚愉
炙芬兮臍

與言真逸卷四
六
嚮分命兮祝釐利成兮降墀送公兮何許靈在天兮無不
之無不之兮奈何雲八荒兮山之阿儻眷眷兮莫適公平
生兮菊坡

右送神

崔清獻公言行錄
外集後卷之十五

趙孟傑

字公甫
新會人

寄郭參寥

上界真人足官府璫玦霞裾萃瑤圃光垂天闕日趨班雲
繞丹墀聯步武嶺南歛忽瘴霧開昂昂一鶴從天來峯頭
謫仙故居士要叫青精共徘徊師雄何事羅浮夢不解凌
風候鸞鳳好風笑語在人閒吹香已滿桃花洞願言寄贈
春一枝天涯未見心相知渺塵獨立萬里思浩歌起舞舒

心期

明福觀

緊泉源之福歷晉宋而至今鄉鄭葛今何處謾追躡而空
尋若有人兮山之阿碧蘿翠蔓延幽深流水以為帶列峯
以為簪松風兮響金奏竹泉兮鳴玉琴恍惚眇莽不可見
但覩萬木森鬱羅翠林夜殘忽疑鸞鳳鳴靜聽思山鳥吟

遙想仙馭飛焱來玉岑

俱羅浮山志

羅蒙正

字希呂其先廬陵人父稽叔遊學新會因家焉蒙正生有異質博學強記弱冠從肇慶羅斗明

學詩盡得其法有名於時縣尹沈壽創古岡書院禮之從遊者甚衆尋省檄為高州學正秩滿歸至正丁亥赴省試遇開武銓或勸其借註巡檢不屑就以詩答之云儒冠不是將軍具只作當年措大看後遭亂避地郡城館憲吏趙式家式薦於行省授南恩州教授州判吳元良陰謀割據欲倚其籌畫用為幕官蒙

正悟其意力辭不就後因病以詩謝之云願賜一塵
閒養病簡編燈火伴青衿未幾卒元良禮葬之希呂
詩格調頗高五言律句
音響尤工有集五卷

春日聞鶯

旭日明臺榭微風散綺羅樹陰涼翠合鶯囀落紅多
闕寂
懷人處閒關奈爾何嶺南天氣好二月已清和

寄謝何東道

故人違我久千里慰相思樽酒成山甕籠鵝到墨池
青山
荒草徑暮雨落花時賴有春洲雁南來可寄詩

登圭峯懷蘇長公

久向風塵厭薄遊到來象外且淹留溪邊石枕和雲臥巖
畔山茶帶雨收古寺老僧非舊主疎林晴色又新秋坡仙

題詠今殘剝詞客登臨誦未休

次韻余太常觀國招撫江南航海至新會八首

日月行天豁翳昏茫茫元氣載重坤三山在望端倪闕萬
水朝宗海瀆尊飛馭羲和凌若木窮河漢使到崑崙功成
得似班司馬絕域多還度玉門

鳳掖珊瑚響珮珂龍池風暖綠生波節舜仙仗排闥去帆
趁春潮帶雨過北極神君尊帝座南箕星象遍天河騷人
舊是瀟湘客幾濯滄浪發浩歌

鴻濛氣接沈寥天夷獠爭迎漢使船駭浪千重行處雪齊
州九點望中烟神遊太乙仙藜外身在盧生海市邊玉署
詞華君獨步聲名知不愧盧前

三殿傳宣敕使來皇華俊彩煥中台方蓬瑞氣翔雙鳳渤
澥濤聲殷萬雷雲夢心曾吞芥蒂邱山名節冠崔巍秋期
歸對金蓮直人在中天白玉臺

繡斧承恩霄漢閒節旌南去幾時還蒼茫析木津頭路縹
緲雲螯海上山禁苑花濃今正發扶桑弓健舊曾彎並遊
羣俊長相憶逸駕重來許共攀

世教湮微竟孰扶空嗟禹貢舊輿圖北庭淑氣仍燕趙南
國遺風尙越吳弭節曉雲三島近濯纓秋水一塵無九重
前席長沙傅莫憚嚴程聽鷓鴣

天開閭闔百官朝賢俊寧煩束帛招丹鳳九重傳鳳詔蒼
龍萬里過龍標飄飄高步瀛州客嫋嫋餘音赤壁簫歸路

湘南芳草遍清風
離思轉迢迢

舳艫千里快乘風
百粵三韓去路通
島樹隱霞春綽約
梅花吹雨曉空濛
水環鼇極坤維碧
雲捧蓬萊日色紅
馳志伊吾鳴劔夜
中興今待漢臧宮

獨秀峯卽事呈都閫諸公

獨秀峯前鬼燐青
戰塵未洗血痕腥
城扉寒掩平川日
烽火明連遠戍星
汀雁失羣秋漠漠
樹烏無夢夜冥冥
蓮花柏樹多材俊
早晚山林見太平

寄黃尙書

尙書昔日絃歌地
芳草萋萋滿訟庭
上界仙題丹桂籍
南州人誦瑞蘭銘
黃雲覆壠秋嘗稻
鐵鍵長歌夜不扃
離亂

如今那可說荒郊過雨髑髏腥

甲子年九月二十五日西寇犯高涼戰於坡山

原頭鐵騎氣如雲妖祲西來白晝昏千里西風吹戰血半
營殘月照城軍竈寒尙認飛仙跡骨冷難招猛士魂盛代
懷柔資輔治兩階干羽已敷文

高州寄友人

梅花又發去年枝遊子天涯未授衣舊友別來書滿篋新
屠兵後草生扉青霄有路凌風到紫水無槎沂月歸歲晚
望鄉心最切太行東北白雲飛

初秋

落日關河笛一聲感時懷抱若爲平燕臺已朽千金骨秦

塞虛防萬里城大火西流金有令長江東去水無情故園
回首干戈滿空負滄浪白鳥盟

寄恩平吳奏記

聞說恩平吳奏記三年戎馬只儒衣魂逃槃瓠營宵拔血
迸颯颯劔夜飛富貴總輸屠狗得行藏未必臥龍非路人
盡識將軍意笑待青袍破賊歸

和白石馬教授二首

蕭蕭白髮映童顏塵世千年邂逅閒三十六陂明月夜許
騎仙鶴過緱山

穠綠溪橋烟樹樹殘紅池沼雨家家遊蜂不悟青韶去猶
抱虛庭薺菜花

懷馬教授二首

陳編落落韋三絕
浮世茫茫海九環
經濟功成疏傅老
漢庭前日得身還

水生白石渡頭灣
念子攜書共往還
今日相思不相見
越

南殘照海門山

馬桂遜 字茂卿新會人
遼陽教授元季亂偕弟
德遜歸隱白石村與羅蒙正輩相吟詠

暮春吟

青山去郭六七里
綠樹拂簷三兩家
山靜衝寒幽鳥起
金

櫻藤上有殘花

新會縣志亦載元詩
選癸之庚上三十六

元詩選桂遜字茂卿新會人祖持國字鯁臣宋南渡時
入粵遂家新會歷授宣教郎乞外調得廣東鹽幕官卒
桂遜仕元為遼陽教授值至正亂挈弟潮陽教
授德遜歸隱白石邨時與羅蒙正輩相吟詠

張

撫

字彥謙新會人受業于羅蒙正幼嗜學性敏強
記年十八賦匡門懷古詩蒙正器之明洪武初
以足疾屢薦不起留心經籍縣令謝景陽為構書堂
于象山之麓扁其軒曰養拙晚年自號病叟人咸以
象山先生稱之共學以明理為要詩文以典雅為本
不事巧琢其弟子不拘學之淺深皆能識其大要云

初夏

何事愁春去微薰生日斜梅黃初著雨鶯老未殘花便汲

懸泉水閒烹廢寺茶逢僧談五乘摩詰已無家

匡門懷古

漁翁知我閒無事拉我乘舟訪鼎湖野草閑花春寂寞蠻

烟瘴雨晝模糊磨匡共說張宏範把酒惟澆陸秀夫興廢

由來總天命臨風何必更長吁

颶風

火雲夾日已西馳驟雨驚風此一時萬里怒濤泛斷梗干
家矮屋失疎籬懸炊破釜侵飄屋護圃枯槎壓嫩杖最是
畚田收未得不堪狼戾子離離

題觀翠亭

亭前積翠景新添瞻眺還堪養靜恬排闥青山懸疊嶂翳
林瑞靄隔疎簾入圖雁蕩徒飛夢絢碧羅浮那得兼天趣
也知隨處有閒來相賞莫相嫌

芝山別意

晚山黃菊滿山房送客郊原野氣涼十幅布帆隨鳥影一
川圖畫載艫航秋風祖道歸心急夜雪催詩賞興狂好事
歌成碑在口王家父子正相當

元詩選癸之
辛下二十二

陳野仙

潮陽人
元隱士

九日登高

黃菊籬邊已放花
摘來盈把泛流霞
振衣直上岡千仞
問酒須逢麴幾車
囊裏霜萸拌盡醉
坐閒秋色轉無涯
等閒啼鳥烟林外
續續溪流淘白沙

題石梅

塊然片石長苔痕
誰種天然太極春
欲向花神問消息
疎

枝無語自黃昏

俱潮雅
拾存

陳文瑤

元末潮陽人
隱居華古巖

石穴洞天

即華古巖
在黃岡山

到處摩崖探白雲
小山花鳥度深春
秦皇空有坑儒計
不

右粵詩蒐逸四卷 國朝番禺黃子高叔立撰按亡友黃君號石溪道光戊子優貢博極羣書尤留意鄉邦文獻著有知稼軒詩文集外集續三十五舉及是書屈氏廣東新語稱漢和帝時南海楊孚爲南裔異物贊亦詩之流也然則廣東之詩其始於孚乎然贊究非詩也又稱孝惠時南海人張買侍游苑池鼓櫂爲越謳時切諷諫晉時高州馮融汲引文華士與爲詩歌梁曲江侯安都爲五言詩聲情清靡數招聚名士如陰鏗張正見之流命以詩賦第其高下以差次賞賜之此皆開吾粵風雅之先者而均不存矣詩始曲江原無足異是書首陳劉刪終元陳文瑤專搜遺逸非選詩也故別集存者不錄明以後作者林立亦不勝

收也故缺焉然如卷二譚粹望仙亭成再書一絕與鄭敬
義望仙臺一首重出但州人作世人耳兩存之亦見矜慎
又吾粵溫謙山舍人詩海一書最號淹博然如例言云廖
有方詩柳州稱爲有大雅之音今已淪亡而是書實存葬
寶雞行路士人一首又云趙必瑑玉淵以詩文名世惜所
著覆瓿集今已淪亡而石溪顧得之余已刊入粵十三家
集中自序云疎脫遺亡誠所不免考訂補輯是所望於後
之人雖撫謙之詞然亦可知編纂之難而完書之不可倉
卒辦也道光庚戌六月南海伍崇曜謹跋